

嘉慶辛酉季

長洲張路玉著

千金方衍義

埽葉山房藏版

孫真人列傳

孫思邈京兆華原人也七歲就學日誦千餘言弱冠
善談莊老及百家之說兼好釋典洛州總管獨孤信
見而歎曰此聖童也但恨其器大適小難爲用也周
宣帝時思邈以王室多故乃隱居太白山隋文帝輔
政徵爲國子博士稱疾不起常謂所親曰過五十年
當有聖人出吾方助之以濟人及太宗卽位召詣京
師嗟其容色甚少謂曰故知有道者誠可尊重羨門
廣成豈虛言哉將授以爵位固辭不受顯慶四年高
宗召見拜諫議大夫又固辭不受上元元年辭疾請

歸特賜良馬及鄱陽公主邑司以居焉當時知名之士宋令文孟詵盧照隣等執師資之禮以事焉思邈嘗從幸九成宮照隣畱在其宅時庭前有病梨樹照隣爲賦其序曰癸酉之歲余臥疾長安光德公之官舍父老云是鄱陽公主邑司昔公主未嫁而卒故其邑廢時有孫思邈處士居之邈道合今古學殫數術高談正一則古之蒙莊子深入不二則今之維摩詰耳其推步甲乙度量乾坤則洛下閎安期先生之儔也照隣有惡疾醫所不能愈乃問思邈名醫愈疾其道何如思邈曰吾聞善言天者必質之于人善言人

者必本之于天天有四時五行寒暑迭代其轉運也
和而爲雨怒而爲風凝而爲霜雪張而爲虹霓此天
地之常數也人有四肢五臟一覺一寢呼吸吐納精
氣往來流而爲榮衛張而爲氣色發而爲音聲此人
之常數也陽用其形陰用其精天地之所同也及其
失也蒸則生熱否則生寒結而爲癰贅陷而爲癰疽
奔而爲喘乏竭而爲焦枯診發乎面變動乎中推此
以及天地亦如之故五緯盈縮星辰錯行日月薄蝕
孛彗飛流天地之危診也寒暑不時天地之蒸否也
石立土踊天地之癰贅也山崩土陷天地之癰疽也

奔風暴雨天地之喘乏也川瀆涸竭天地之焦枯也
良醫導之以藥石救之以鍼劑聖人和之以至德輔
之以人事故形體有可愈之疾天地有可消之災又
曰膽欲大而心欲小智欲圓而行欲方詩曰如臨深
淵如履薄冰謂小心也赳赳武夫公侯干城謂大膽
也不爲利回不爲義疚行之方也見幾而作不俟終
日智之圓也思邈自云開皇己酉歲生至今年九十
三矣詢之鄉里咸云數百歲人話周齊間事歷歷如
眼見以此參之不啻百歲人矣然猶視聽不衰神采
甚茂可謂古之聰明博達不死者也初魏徵等受詔

修齊梁陳周隋五代史恐有遺漏屢訪之思邈口以傳授有如目覩東臺侍郎孫處約將其五子倓倣俊佑佺以謁思邈思邈曰俊當先貴佑當晚達佺最名重禍在執兵後皆如其言太子詹事盧齊卿童幼時請問人倫之事思邈曰汝後五十年位登方伯吾孫當爲屬使可自保也後齊卿爲齊州刺史思邈孫溥果爲徐州蕭縣丞思邈初謂齊卿之時溥猶未生而預知其事凡諸異跡多此類也永淳元年卒遺令溥葬不藏冥器祭祀無牲牢經月餘顏貌不改舉屍就木猶若空衣時人異之自注老子莊子撰千金方三

十卷行於代又撰福緣論三卷攝生真錄及枕中素

書會三教論各一卷子行天授中爲鳳閣侍郎

自云生于

開皇乃托辭也如果生於隋何周宣帝時便以王室多故隱居太白山耶

孫真人千金方本序

夫清濁剖判上下攸分三才肇基五行俶落萬物淳
朴無得而稱燧人氏出觀斗極以定方名始有火化
伏羲氏乃因之而畫八卦立庖廚滋味旣興疴瘵萌
起大聖神農氏愍黎元之多疾遂嘗百藥以救療之
猶未盡善黃帝受命創制九鍼與方士岐伯雷公之
倫備論經脈旁通問難詳究義理以爲經論故後世
可得依而暢焉春秋之際良醫和緩六國之時則有
扁鵲漢有仲景倉公魏有華陀竝皆探賾索隱窮幽
洞微用藥不過二三灸炷不逾七八而疾無不愈者

晉宋以來雖復名醫間出然治十不能愈五六良由
今人嗜欲太甚立心不常淫放縱逸有闕攝養所致
耳余緬尋聖人設教欲使家家自學人人自曉君親
有疾不能療之者非忠孝也末俗小人多行詭詐倚
傍聖教而爲欺紿遂令朝野士庶咸恥醫術之名多
教子弟誦短文構小策以求出身之道醫治之術闕
而弗論吁可怪也嗟乎深乖聖賢之本意吾幼遭風
冷屢造醫門湯藥之資罄盡家產所以青衿之歲高
尚茲典白首之年未嘗釋卷至於切脈診候採藥合
和服餌節度將息避慎一事長於己者不遠千里伏

膺取決至於弱冠頗覺有悟是以親鄰中外有疾厄者多所濟益在身之患斷絕醫門故知方藥本艸不可不學吾見諸方部帙浩博忽遇倉卒求檢至難比得方訖疾已不救矣嗚呼痛天枉之多厄惜墜學之昏愚乃博採羣經刪裁繁重務在簡易以爲備急千金要方一部凡三十卷雖不能究盡病源但使畱意於斯者亦思過半矣以爲人命至重有貴千金一方濟之德踰於此故以爲名也未可傳於士族庶以貽厥私門張仲景曰當今居世之士曾不畱神醫術精究方藥上以療君親之疾下以救貧賤之厄中以保

身長全以養其生而但競逐榮勢企踵權豪孜孜汲汲惟名利是務崇飾其末而忽棄其本欲華其表而悴其內皮之不存毛將安附進不能愛人知物退不能愛躬知己卒遇風邪之氣嬰非常之疾患及禍至而後震慄身居死地蒙蒙昧昧驚若遊魂降志屈節欽望巫祝告窮歸天束手受敗齎百年之壽命將至貴之重器委付庸醫恣其所措咄嗟暗悔厥身已斃神明消滅變爲異物幽潛重泉徒爲一悲痛夫舉世昏迷莫能覺悟自盲若是夫何榮勢之云哉此之謂也

孫真人千金方序

昔神農徧嘗百藥以辯五苦六辛之味逮伊尹而湯液之劑備黃帝欲創九鍼以治三陰三陽之疾得岐伯而砭艾之法精雖大聖人有意於拯民之瘼必待賢明博通之臣或爲之先或爲之後然後聖人之所爲得行於永久也醫家之務經是二聖二賢而能事畢矣後之畱意於方術者苟知藥而不知灸未足以盡治療之體知灸而不知鍼未足以極表裏之變如能兼是聖賢之蘊者其名醫之良乎有唐真人孫思邈者乃其人也以上智之材抱康時之志當太宗治

平之際思所以佐迺后庇民之事以謂上醫之道眞
聖人之政而王官之一守也而乃祖述農黃之旨發
明岐摯之學經掇扁鵲之難方採倉公之禁仲景黃
素元化綠帙葛仙翁之必效胡居士之經驗張苗之
藥對叔和之脉法皇甫謐之三部陶隱居之百一自
餘郭玉范汪僧垣阮炳上極文字之初下訖有隋之
世或經或方無不採摭集諸家之所祕要去衆說之
所未至成書一部總三十卷目錄一通臟腑之論鍼
灸之法脈證之辯食治之宜始婦人而次嬰孺先脚
氣而後中風傷寒癰疽消渴水腫七竅之病五石之

毒備急之方養性之術總篇二百三十二門合方論
五千三百首莫不十全可驗四種兼包厚德過於千
金遺法傳於百代使二聖二賢之美不墜於地而世
之人得以階近而至遠上識於三皇之奧者孫真人
善述之功也然以俗尚險怪我道純正不述刳腹易
心之異世務徑省我書浩博不可道聽塗說而知是
以學寡其人寢以紛靡賢不繼世簡編斷缺不知者
以異端見黜好之者以闕疑輟功恭惟我朝以好生
爲德以廣愛爲仁迺詔儒臣正是墜學臣等述謝多
通職專典校於是請內府之祕書探道藏之別錄公

私衆本搜訪幾遍得以正其訛謬補其遺佚文之重
復者削之事之不倫者緝之編次類聚期月功至綱
領雖有所立文義猶或疑阻是用端本以正末如素
問九墟靈樞甲乙太素巢源諸家本草前古脈書玉
函金匱肘後備急謝士秦刪繁書劉涓子鬼遺論之
類事關所出無不研核尚有所闕而又沂流以討源
如五鑒經千金翼崔氏纂要延年祕錄正元廣利外
臺祕要兵部手集夢得傳信之類凡所派別無不考
理互相質正反覆稽參然後遺文疑義煥然悉明書
雖是舊用之惟新可以濟含靈裨明聖好生之治可

以傳不朽副主上廣愛之心非徒爲太平之潤色實

可佐皇極之錫福校讎旣成繕寫伊始恭以上進庶

備親覽太子右贊善大夫

臣高保衡

尚書都官員外

郎

臣孫奇

尚書司封郎中充祕閣校理

臣林億

尚書

工部侍郎兼侍講

臣錢象先

等謹上